



《全唐诗》卷一百一十三 裴耀卿

《全唐诗》卷一百一十三

卷113_1

「敬酬张九龄当涂界留赠之作」裴耀卿

茂先实王佐，仲举信时英。气睹冲天发，人将下榻迎。
珪符肃有命，江国远徂征。九派期方越，千钧或所轻。
高帆出风迥，孤屿入云平。遄迈嗟于役，离忧空自情。
饰簪陪早岁，接壤厕专城。旷别心弥轸，宏观义转倾。
徒然恨饥渴，况乃讽瑶琼。

卷113_2

「酬张九龄使风见示（时为宣州刺史）」裴耀卿

兹地五湖邻，艰哉万里人。惊飙翻是托，危浪亦相因。
宣室才华子，金闺讽议臣。承明有三入，去去速归轮。

卷113_3

「赠张丞相」宋鼎

汉上登飞鹢，荆南历旧居。已尝临砌橘，更睹跃池鱼。
盛德继微渺，深衷能卷舒。义申蓬阁际，情切庙堂初。
郡挹文章美，人怀燮理馀。皇恩悦照亮，岂厌承明庐。

卷113_4

「酬故人还山」宋鼎

举棹乘春水，归山抚岁华。碧潭宵见月，红树晚开花。
肃穆轻风度，依微隐径斜。危亭暗松石，幽涧落云霞。
思鸟吟高树，游鱼戏浅沙。安知馀兴尽，相望紫烟赊。

卷113_5

「和张荆州九龄晨出郡舍林下」崔颂

优闲表政清，林薄赏秋成。江上悬晓月，往来亏复盈。
天云抗真意，郡阁晦高名。坐啸应无欲，宁辜济物情。

卷113_6

「奉酬张洪州九龄江上见赠」孙翊

受命猷封疆，逢君牧豫章。於焉审虞芮，复尔共舟航。
怅别秋阴尽，怀归客思长。江皋枉离赠，持此慰他乡。

卷113_7

「古意赠孙翊」徐仁友

南望缙氏岭，山居共涧阴。东西十数里，缅邈方寸心。
云日落广厦，莺花对孤琴。琴中多苦调，凄切谁复寻。

卷113_8

「奉和姚令公驾幸温汤喜雪应制」苏绾

汉主新丰邑，周王尚父师。云符沛童唱，雪应海神期。
林变惊春早，山明讶夕迟。况逢温液霈，恩重御裘诗。

卷113_9

「咏月」康庭芝

天使下西楼，光含万里秋。台前疑挂镜，帘外似悬钩。
张尹将眉学，班姬取扇俦。佳期应借问，为报在刀头。

卷

113_10 「山行见孤松成咏」张宣明

孤松郁山椒，肃爽凌清霄。既挺千丈干，亦生百尺条。
青青恒一色，落落非一朝。大厦今已构，惜哉无人招。
寒霜十二月，枝叶独不凋。

卷

113_11 「使至三姓咽面」张宣明

昔闻班家子，笔砚忽然投。一朝抚长剑，万里入荒陬。
岂不服艰险，只思清国讎。山川去何岁，霜露几逢秋。
玉塞已遐廓，铁关方阻修。东都日昏昏，西海此悠悠。
卒使功名建，长封万里侯。

卷

113_12 「新都南亭别郭大元振」卢崇道

竹径女萝蹊，莲洲文石堤。静深人俗断，寻玩往还迷。
碧潭秀初月，素林惊夕栖。褰幌纳鸟侣，罢琴听猿啼。
佳辰改宿昔，胜寄在睽携。长怀赏心爱，如玉复如珪。
